



SUTTON PARK SCHOOL
89 Vine Street, Mangere East, Auckland 2024
Telephone (09) 276 4560 Facsimile: (09) 276 4529

Principal: Fa'atili Iosua Esera

27 Aperila 2020.

E faafetaia pea lo outou mamalu Mātua e,

E faagae'etia lava le agaga, ona ua siliga se tala faanoanoa i totonu o si o tatou aiga (community) a o feagai ai tatou ma le faama'i mata'utia o le Koviti 19. E manatua pea se tala faamomoi loto, ona o i latou sa maliliu i le 100 tausaga ua tuana'i, i le masina leni o Aperila, ona o le gasegase o le fulū i Sepānia. Sa matuā maua ai le fuainumera i atumotu o le Pasefika. O Samoa, e 38,000 soifua na ma'umau ai, a o Niu Sila, e 6,400. Pe a tatou vaavaai i le to'a 19 ua maliliu i le taimi nei, ona o le Koviti 19. E tataua lava ona tatou faafetaia ai le alofa o le Atua.

Ua i ai aiaiga ma ioega ua pasia e le Komiti Faafoe o Sutton Park, mo le taimi o le a toe tatalaina ai le a'oga.

- i. I le taimi leni o le Vavao, o le a na o faiaoga lava ma tamaiti a'oga, o le a faatagaina e ulufale i laufanua o le a'oga. E lokaina le pā a le a'oga mai le 9am seia oo i le 3pm.
- ii. O le a i ai taimi tusitusia ma faamaumauina i le ofisa mo i latou e asia le a'oga.
- iii. O le a eseese taimi mo le fanau e amata ai, malolo ai ma toe foi ai i aiga.
- iv. O le vaiaso na te'a nei, na tufaina atu ai alaga-oa faale-tekonolosi (chromebooks) mo fanau o le Tausaga 5 e oo i le Tausaga 8. O le toatele o aiga, na oo atu i ai lea fesoasoani. Ae afai na oo atu chromebooks mo nai fanau, faamolemole, e tāua tele le vaaia lelei o ia vaega, ona e lē taugofie le toe faaleleia pe a faaletonu ma leaga.
- v. E mafai foi ona faasoa ma faaaoga faatasi uma e nai fanau, ia alaga-oa, a o maua le avanoa e pei ona tufaina atu.
- vi. O lo o i ai pea galuega mo le Tausaga 1 e oo i le Tausaga 4, i luga o upega o fesoota'iga a le a'oga.
- vii. O lo o i ai foi galuega i luga o televise (TV) mo tamaiti uma (Tausaga 1 e oo i le Tausaga 8).
- viii. O faiaoga ma tamaiti uma, o le a faaaogaina ufiufi fofoga a o i ai i taimi o le a'oga.

- ix. Ua i ai fuafuaga maumau tutū, mo vasega taitasi, ina ia tausisia pea le nonofo ai i a latou lava bubbles, e tusa ai ma aiaiga fa'ataatitia mo le saogalemu.
- x. E lē toe i ai foi se faleoloa ma meaai e tatalaina, (pie room) lē toe i ai ni breakfast poo free lunch e pei ona masani ai. Lē toe i ai foi se SKIDS.
- xi. O mea'ai uma o le a saunia ma teu mai 'aiga, atoa ai ma vaiinu, e manaomia a latou fagu vai.

O le soifua lelei ma le maloloina o fanau, faiaoga ma le faalapotopotoga (community) e tataua lava ona matuā faatāuaina. O lou lagolagoina ma le tausisia o nei suiga, o le a iloiloaina lea i vaiaso taitasi.

Pe afai o le a i ai se tasi o le fanau, poo se faiaoga, o le a pēsia i le siama o le faama'i, o le a tapunia loa le a'oga, mo se taimi umi.

O le auai mai o fanau i le a'oga, a o i ai i le Vaega 3 mo le Saogalemu (Alert Level 3) o le a faalagolago tele lea i le filifiliga a Mātua. Afai e te silafia o loo saogalemu pea nai fanau i le fale, ona tuu lea o i latou i le fale. Ae o le a galulue pea faiaoga mo galuega a le fanau, o le a lē mafai ona auai mai i le a'oga.

Ae mo le taimi lenei, o le nofoaga silisili ona saogalemu mo fanau, o totonu lava o le aiga. O nei suiga ua faia, ina ia mautinoa lo tatou saogalemu faatasi mai le faama'i. Peita'i, e lē mafai e le Komiti Faafoe, poo a'u nei, ona matou faapea atu, o le a saogalemu lou alo mai le Korona vairusi 19, i totonu o Sutton Park.

O lenei Vavao, ua avea ma avanoa silisili ona tāua, mo Mātua, e fesootai atili ai ma nai fanau. E talatalanoa ai, a'oa'o le fanau i tū ma aga i totonu o aiga, a'oa'o nai pese, ma faata'ita'i le tāina o la'au tau musika (piano/kitara) faamatala i ai ni tala o taimi ua tuanai/tala o le vavau, fa'aa'oa'o i ai le kukaina o se taumafa faaSamoa (faiga o se umu) Faitauina o le Tusi Pa'ia, fai se tautalaga faafetai, fatufatu se tauloto po o se pese, tusi se tusi e momoli ai alofaaga ma faamanuiaga i le isi tagata, O se avanoa tāua tele, e faata'ita'i atu ai le fanau iā oe le matua, ia 'aia nei e faavaivai, a ia taumafai i le mafai silisili e mafai ai. O le a avea lenā o se pine faamau i olaga o le fanau, o le a lē mafai ona toe mamulu. Ia maua pea lou to'a, ma le lava-papale mo nai fanau. Aua foi ne'i avea galuega a le fanau ua tuuina atu, ma ala e te atuatuvaale ma e popole ai. A ia tou maua faatasi le fiafia, a o tou mafuta ma nonofo ai i malu o maota ma laoa.

Faafesootai le faiaoga o lou alo, pe a manaomia nisi faamatalaga i le taimi nei. Faafesootai mai a'u i le principal@suttonpark.school.nz, po o le 021 250 6684, i se text, pe a manaomia la'u fesoasoani. Ou te feso'ota'i atu.

Ia i ai pea aao alofa o le Atua mo outou uma, seia oo ina toe faatasia si o tatou aiga,
i se taimi o i luma.

Faafetai tele lava,

O alofaaga ma faamanuiaga :

Fa'atili Iosua Esera
Pule A'oga o Sutton Park
Master of Education [Merit]